

BIDDAG VIR ONDERWYS - 8 FEBRUARIE 2015

Oorsig oor die stand van onderwys:

Op die gebied van die onderwys is die uitdagings steeds enorm. Dit is egter ook so dat daar vordering gemaak is met sekere van die probleemareas. Die kerk is dankbaar dat daar talle rolspelers, van die minister van basiese onderwys tot by onderwysers in die klaskamer is, wat uitstekende werk doen. Die minister is een van die min politici wat bereid is om te erken dat daar probleme is. Dit is 'n stap in die regte rigting.

Van die groot uitdagings is steeds dat twee-derdes van alle skoolbeginners steeds nie 'n matrieksertifikaat behaal nie. Die 2.4%-daling in die slaagsyfer (75.8% in 2014 teenoor 78.2% in 2013) is allerweë verwag, as gevolg van die implimentering van CAPS (KABV). Sedert die inwerkingstelling van die jaarlikse nasionale assesseringstoetse (ANA's) in 2012 het die gemiddelde wiskundepunt vir gr 9 van 13% tot 10,8% gedaal. Leerders se gebrekkige begrip van wiskundige konsepte, sowel as onderwysers se klaarblyklike gebrek aan die nodige kennis is die redes vir die swak punte. Die feit dat 80% van leerders nie in hul moedertaal onderrig ontvang nie, speel 'n bydraende rol.

Onreëlmatighede by sekere eksamensentrums het 'n klad veroorsaak op die 2014 uitslae. Hopelik sal maatreëls in plek geplaas word om soortgelyke insidente te voorkom.

Die Kerk sou graag 'n beroep op die departement wou doen om dit te heroorweeg om die name van leerders teenoor hul uitslae te publiseer. Leerders, ouers, onderwysers en skole wat streef na uitnemendheid verdien om daarvoor erkenning te kry. Positiewe erkenning het meer waarde as om die negatiewe te verbloem, wat uiteindelik die hele stelsel negatief raak.

Vanuit 'n kerklike perspektief is 2015 'n jaar wat die hofsaak rondom godsdiensonderrig op skole baie belangstelling sal uitlok. Ses skole is gewikkel in 'n hofaansoek wat hulle wil dwing om hul Christelike gebruike te laat vaar en dit ongrondwetlik te verklaar. Paul Colditz, uitvoerende hoof van die Federasie van Beheerliggame van Suid-Afrikaanse Skole (Fedsas) wat die skole in die aansoek bystaan, is van mening dat die hofaansoek die "omvangrykste en belangrikste" is waarby hulle tot nog toe betrokke was. Dit raak nie net die ses skole nie, maar alle skole. Die saak raak die kern van hoe Suid-Afrika in 'n grondwetlike bestel funksioneer.

Die Organisasie vir Godsdiensonderrig en Demokrasie (Ogod) vra die hof in 'n toetsaak om dit ongrondwetlik te verklaar dat een geloof bo 'n ander in openbare skole uitgeleef word. Die organisasie vra die hof ook om ses skole se Christelike gebruike met 'n interdik te verbied en ongrondwetlik te verklaar. Dié skole is die Hoërskool Linden in Johannesburg, die Laerskool Randhart in Alberton, die Laerskool Baanbreker in Boksburg, die Laerskool Garsfontein in Pretoria, die Hoërskool Oudtshoorn en die Langenhoven Gimnasium in Oudtshoorn.

Dié skole was veronderstel om al in Oktober op Ogod se aansoek in die hooggeregshof in Johannesburg te antwoord, maar het uitstel gevra. **Die NG Kerk is van voorneme om saam met ander denominasies en geloofsgroepe as 'Vriend van die hof 'op te tree.** Vir hierdie belangrike saak word lidmate se voorbidding en ondersteuning voor gevra.

HULPVERLENING - BIDDAG VIR ONDERWYS EN OPLEIDING – 8 FEBRUARIE 2015

Soos die gebruik in die verlede, bied die Biddag vir onderwys en opleiding, 'n uitstekende geleentheid vir gemeentes om by skole in hulle omgewing betrokke te raak. Skole word deur die kerk as belangrike vennote saam met ouers in die opvoeding van jongmense gesien. Die Biddag op 8 Februarie is 'n geleentheid om solidariteit met skole te demonstreer. Leerders, onderwysers en ouers is lidmate van die kerk en verdien die onderskraging en bemoediging van die kerk gesien in die lig van die talle uitdagings.

Die volgende wenke kan help om van die 8ste Februarie 'n betekenisvolle geleentheid te maak:

- Nooi plaaslike onderwysers, skoolhoofde na die spesifieke erediens. Doen spesifiek vir hulle voorbidding tydens die liturgie. Sing hulle 'n seënbede toe. Besoek die plaaslike skole, nooi ander leraars saam, neem iets wat tydens pouse saam in die personeelkamer geniet kan word, saam. Gee die leraars geleentheid om vir die personeel voorbidding te doen.
- Bied hulp en ondersteuning aan, vra waar daar behoeftes is waar die kerk mee kan ondersteun. Dit kan 'n verskeidenheid wees: fasiliteite, mannekrag, kundigheid, hulp met kinders in die na-skool (bv hulp met huiswerk ens), voedselprojek vir minderbevoorregte kinders, ekstra klasse in Wiskunde, Wetenskap, ens.

Sake waarvoor voorbidding gedoen kan word:

- Die ministers van Onderwys, plaaslike onderwys-strukture.
- Dankbaarheid vir uitstekende skoolhoofde en onderwysers, dosente, ouers en leerders.
- Plaaslike skole, skoolhoofde, beheerliggame, onderwysers, ouers en leerders.
- 'n Fokus vir 'n eie gemeentelike betrokkenheid.
- Voorbidding vir werklose jongmense.

Wees kreatief en laat weet wat werk vir julle in die inrigting van die geleentheid sodat ons dit volgende keer met ander kan deel.

Sterkte en seën.

Gustav Claassen